

中國經濟史綱

中國經濟史綱

中國經濟史綱

中國經濟史綱

種
痘
指
掌

撰人不詳

中
華
書
局

叢書集成初編

海藏癡論萃英（及其他三種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

種痘指掌

叢書集成初編所選借月山
房彙鈔及澤古齋重鈔皆收
有此書且同一版本借月在
先故據以影印


種痘指掌序

種痘一科古方書所未載

御纂醫宗金鑑始備門目提綱挈領學者固可得其宗旨矣但一切看種擇苗之法術家以爲另有秘授作專門衣鉢之計故習是業者苟不得秘授有其法而不敢輕試而人亦不之信良足慨也丙辰春偶得種痘指掌一卷其書不著撰人姓氏論種痘用苗選擇禁忌之法與金鑑足相發明而所謂專門授受者亦不外是夫種痘一法全以人事斡旋造化果循此法行之真可萬不

失一乃老于醫者猶不免有誤其故有二非見于時痘盛行之日卽出于不宜種痘之兒醫者不守禁忌苟且嘗試致失萬全此豈種痘之外歟至于種痘之先後維持調護培養本原此又在爲父母者之責并非醫者之任矣篇中誤種救解之法姑備一說或未可盡信又神苗元化丹有其名而秘其方質之吾邑老醫皆無需此而自奏神效或亦以爲姑且惑人之說存而勿論第夏月接苗一法已爲是科鑿破混沌信祕傳也外尚有朱氏種痘秘旨一書略載方劑合而觀之種痘之方盡于

是矣嘉慶戊辰春日黃廷鑑識



種痘指掌

失 名

種痘之道如彼嘉穀由苗而秀由秀而實固恃乎種之功尤貴夫苗之美也夫苗之美者有二曰仙苗曰神苗仙苗者不染塵穢之氣神苗者包涵健順之性苟信之者真而見不介乎疑似藏之也固而氣無使乎洩宜屈非寒非暑之時乘天朗氣清之候以無恙之兒施出神之技種則必出出則未有不奏奇功此種痘保全之道要非淺鮮之爲也人自受生之初孕毒潛伏于腎部遇

天瘟流行染觸而出名曰時痘猶鏡中之日光射及而發是亦逼之使然也順痘固多而逆而凶暴者亦復不少領毒達表者主乎氣氣不和則形不鬆載毒外揚者由乎血血不融則色不澤而凡稀密不勻紅紫不一甚或腰疼腹痛噎嗽音啞隨熱隨出等症氣血雖足不及防備反爲毒肆猶迅雷不及掩耳險逆之禍可勝道哉是知非本然之毒盛遇天時不正之惡癘猝然而行以致此也故有腹痛發斑者報點塌陷者種種不一况又值夫外感內傷驚悸客忤一發熱而痘卽隨之感乎風

者肌表爲之阻塞感乎寒者腠理爲之冰凝傷乎飲者
盪其脾而二便不調傷乎食者停于中而胃氣不暢驚
悸則神思散亂客忤則魂魄難收一遇嚴寒酷暑不特
調護維艱病者精神亦難支持觀此而種痘之功顧不
重歟蓋種痘者值天氣暢和之候選神仙有力之苗施
于病疴弗染之體男左女右塞于鼻孔微以純陽至健
之芳氣逗其深潛未動之元根勿爲邪感勿爲熱侵至
三日後頸項二處腫塊先呈俗名喜塊塊越大則痘越
稀此佳兆也至六七日間身漸熱而痘出朗朗見點而

身涼者氣血調和裏束完聚頓拔而起神恬氣靜穩保無虞至若無力之苗有遲至七日八日後乃身熱而驟出者此或秘密之不可定甚或延至十餘日身壯熱而湧出者乃繁密難安耳故由種而出出而如期者氣血自和無慮其勞逸無慮其縱橫無傷乎臟腑無耗乎精神身熱不甚二便如常四肢溫煖五官明潤目更有神笑容自若自內及外靡一不寧其形自然綻凸其色自然光瑩其顆粒自然圓爭縱或稍密界畫枝分成癩回醫必能應期收功勿藥有喜此種痘之所以迥勝時痘

而毫無疑慮者也其或思患預防可服硃砂六一散少許以珠能解骨髓中之毒熱砂能辟邪鎮心使客氣不犯內加金箔調暢氣血可壯中外元神使肌膚色潤滑石療澁結利膀胱清理六腑之邪陽從溺而出甘草和中能解諸毒初出之時如是足矣至于調攝之法不過鉤藤薄荷以治驚甘桔元參以清喉大力蟬蛻以起透升麻葛根以開肌荊芥防風以疏表山查廣皮以順氣川芎紅花以活血丹皮生地以涼血犀角黃連連翹以解熱天蟲白芷以驅風定痒歸芍銀花以滋養成痂以

此類推屈指可數石膏之清細辛麻黃之散無庸也參
芪桂附之溫補大黃芒硝之攻伐甲片蜂房胎髮人齒
臍帶之發酵無庸也若夫落茄之後或用參芪甘草益
其氣歸芍地黃養其血山藥米仁健其脾芩朮助其元
陽鹿茸河車壯其筋骨補胎元之不足俾一生之強壯
若夫未種之先于耳後之筋紋尤當細驗訣曰耳下不
宜冷耳上不宜熱耳後驗筋紋溫和淡紅色者此兒若
與種之出痘包他吉如紋脈細淡全無血色者胎元薄
也紋脈全無元不續也濁紋密佈過輪勾轉者毒將熾

也紋色青紫或現青蓮茄花木筆絳桃等色雜乎其間
皆血不和也紋粗直硬或根襍亂或條直豎或更有細
碎多頭者皆氣不順故也更有形如蘭花如燈花形粗
色異種必焦紫密佈不分顆粒又有青黑細縷相間者
勢必夾班密布難透斷不宜種又有形如鋼叉色若生
鉄尤不可種及面顏晦滯氣濁神粗則知內脈壅滯亦
斷不宜種倘無是諸類者種後忽露急將耳紋惡血連
針刺出以犀角地黃湯爲丸用透肌湯化下痘至而身
不燔灼神不昏迷卽其驗也更宜慎者病初愈而元神

未復瘡痕甚而氣血不和皆不宜種也素患腸痛者防蟲種之不消素患食疳者防疳疾復作亦未可種也脾胃常虧者種痘雖佳使元陽外佈內乏溫養恐舊疾復作亦宜謹慎也其最險者癘氣已染不顧而種非期而出出則難保此醫家大患也感冒未清鼻息閉塞不辨而種過期不出亦不可不知也時疾徧染彼雖無疾必言其故亦不可妄投也夫既得夫種之之法尤宜講其種之之苗時痘之苗其性不純摠美勿用時痘盛行雖係種苗恐染時邪亦宜謹慎種出之苗或染客症體元

不足苗亦無力兼恐染傳客疾不宜收用新收之苗當下卽種神氣完足其驗雖易不可多用多則必密若越三日後力漸薄而滯氣臻常有瘡毒之患必俟七日元氣復來滯氣退消庶幾無患擇苗者得飽滿肥膩之漿以棉花拭收用若用痘靨取尖細潤澤者時佩身旁護好鮮者其氣壯少用亦無不出宿者多用出者少若再少用則不出者亦有之此不可不知也用時以牙箸研極細末微滴以清水末細則氣宣而易達水潤則滋澤而邪清斷不可火焙火焙則火毒侵惹苗性失而無用